



Vuk'uzenzele

Uyethulelwa ngezokuThintana nokuNikela ngeLwazi kukaRhulumende (GCIS) isiNdebele/English UMrhayili 2016 UmGadangiso I



Umnotho wezemaLwandle weSewula Afrika ufaka amaBhiliyoni
Ikhasi 2



linGidi ezima-R210 zokuvuselela iindlela namabhorrho weJwanasbhege
Ikhasi 5

INEMIKHANGISO YEMISEBENZI

UmNyango wezangeKhaya uHloma iHlelo lokuFaka iimBawo zikaMazisi oliKarada nge-Inthanethi



UMengameli u-Jacob Zuma noNgqongqotjhe wezangeKhaya uMalusi Gigaba mhlana kuhlonywa iHlelo lokwEnza iimBawo nge-Inthanethi, i-e-HomeAffairs.

Nonkululeko Mathebula

UmNyango wezangeKhaya sewenze abantu ubulula obukhulu bokufaka iimBawo zikamazisi olikarada kunye nezamapaspoti. Abantu abahlala e-Gauteng neKapa abasidingo sokufola imijeje bayokufaka iimBawo zokuthola iincwadi abazifunako, kodwana sebangenza iimbawezo emakhomphyutheni, bese bayozithatha emabhanga ngelanga elitjhiwoko. UmNyango wezangeKhaya wenze isivumelwano sokuhlanganyela umsebenzi lo namabhanga amane angamakhulu lapha eSewula Afrika: I-Absa, i-FNB, i-Standard Bank kunye ne-Nedbank ngomnqopho wokuphumelelisa ihlelo le-e-HomeAffairs lomNyango wezangeKhaya. Ihlelweni linqophe ukuphungula imijeje efolwa babantu ema-ofisini ali-140 arhatjheke nelizwe lokeli, libe lenze nemisebenzi yomnyango lo itholakale lula. UNgqongqotjhe wezangeKhaya uMalusi Gigaba uthi iSewula Afrika ililizwe lokuthoma elithome ukusebenzisa ihlelo elinjle.

IHLELO LE-E-HOMEAFFAIRS

I-e-HomeAffairs inikela abantu beminyaka yobudala ehlangana kwama-30 nama-35 ukuthi benze iimBawo zokuthola abomazisi babo namapaspoti nge-inthanethi, bathumele nemitlolo ekhambisana neembawo lezo, babe bakhona ngitjho nokubhadelela iimBawo zabo khona ku-inthanethi. Bangabe bakhona nokubekiselana isikhathi sokubonana neemphathimandla zemabhanga wabo emabhanga akhethekile kobanyana bayokuthatha iinthombe

babe bafakazele nemigadangiso yemino yabo. Msinyana ngemva kwalokho, umfakisibawo uzakuthonyelwa i-SMS emtjela ukuthi angayoyithatha nini imitlolkakhe abekenze isibawo sokuyithola. UMazisi oliKarada ubiza R140, bese kuthi ipaspoti yona ibize R400.

Bekube khathesi, sebangaphezulu kwee-4 000 abantu esele bazitlolise ngendlela ye-inthanethi.

UMengameli u-Jacob Zuma uthe nakakhuluma ekuhlonweni kwehlelweni, wathi uyathokwa ngamagadango wezokuphepha athathwa mNyango wezangeKhaya. Uthi ukuthoma kokusetjenziswa kukaMazisi oliKarada endaweni kamazisi oyibhugwana wombala ohlaza satjani, onebhakhowudi, ngomnyaka wee-2013, kube liliqha eliqakatheke khulu.

“Nangambala sithokozile ukuthi amabhanga wekhetu asebenzisana nomNyango wezangeKhaya. UmNyango lo uyisika yepilo yabo boke bekhethu nabo boke abanye abahlala lapha elizweni lekhethu,” utjho ahlathulula.

UMengameli uZuma ukhombele ikoro yangeqadi ukuthi isekele umNyango wezangeKhaya ngawo woke amandla engakghona ngawo.

UKWANDISA AMABHANGA ESI-ZAKUSEBENZISANA NAWO

Kusesenjalo, uNgqongqotjhe uGigaba uthi umNyangwakhe uzokumele namanye amabhanga ukuthi nawo ahlangelele nomNyango wakhe kilelilelo. “Silinga ukunabisa ihlelo lethweli bona lifike ebantwini abanengi, kobanyana kuzokuba lula ukuthi abantu bazenzele iimBawo zokuthola imitlolo abafuna ukuyithola emNyangweni lo. “Akunaphepha elisetjenziswako kilo loke ihlelweni, ngoba lisebenza ngekhomphiyutha kwaphela, begodu akukho la umuntu afaka khona isandla.

“Ungathemba ukuthi lokhuya amazisi wakho olikarada nakafika kuwe, uzabe athintwe muntu kanye nje tere, lokhuya nakakhanjiswa ngemvilobhi ukusuka lapho ikarada lakho ligadangiswe khona ukuya e-ofisini la wena uyo-lithola khona,” kutjho uNgqongqotjhe uGigaba.

SENZA UBUNGCONO BEZENZELWA

UmNqophisi Zombebele womNyango

wezangeKhaya uMkhusele Apleni uthi ihlelweni godu linqophe nokwenza ubungcono bendlela umsebenzi owenzelwa abantu uragwa ngayo kilomNyango yokusetjenziswa kumbi.

“Ubukhohlakali bukhe babhoka khulu, abomazisi babantu betjiwa, bahlala basengozini yokusetjenziswa kumbi.

“UmNyangwethu bewuhlotjaniswa nokufola imijeje emide, abantu balinde ama-awa amanengi isiphelani balindele ukwenzelwa imisebenzi abayidingako, sabe sakateleleka ukuthi sikhambisane neenkhathe, nathi sisebenzise ubuhle bechwephetjhe esele likhona, njengamanye wephasi loke yokusetjenziswa kumbi.

“Ubuhle behlelweni kukuthi izakhamuzi ezikhetha ukusebenzisa lelihlelo azizukufola emjejeni ema-ofisini zilindele ukusizwa; lokhu-ke kutjho ukuthi ama-ofisi womNyango wezangeKhaya azakwethulwa umthwalo, athole ithuba lokubasiza msinyana abanye abantu abangakghoniko ukusebenzisa ihlelo lethu elitjheli,” kuhlathulula u-Apleni.

Isakhamuzi se-Roodepoort, ncangetjingalanga yefwanisbhege, uLungile Maseko utjele bakwa-Vuk'uzenzele ukuthi uthabile ngehlelo lethu elitjheli.

“Ngiyathokoza ukubona ukuthi urhulumende uhlala soke isikhathi athola iindlela zokusebenzela ngcono izenzelwa asenzela zona

“Nanyana mina ngokwami ngingakwazi nje ukusebenzisa ihlelweni ngoba ngivinjwa minyaka yami yobudala, kodwana ngiyavuma ukuthi ihlelweni lihle khulu. Akunakuzaza ukuthi lizobuqeda ubukhohlakali, kanti abantu angeze basakateleleka ukuthi bakhombele ukutjhatjhuulwa emsebenzini kobanyana bayokulungisa iindaba zabomazisi namkha zamapaspoti,” kutjho uMaseko.

UmNyango wezangeKhaya unesiqiniseko sokuthi ihlelweni lizakugcina linabele nakizo zoke ezinye iindawo elizweni lekhethu lokeli, ligcine ngokuthi abantu sebalisebenzisela nokuthola ngalo iintifikethi zamabeletho nezokufa.

AMAGATJA WAMABHANGA ASELE ASEHLELWENI ELITJHA

ABSA	FNB	STANDARD BANK	NEDBANK
E-ABSA Lifestyle Centre, ese-Centurion.	E-FNB ye-Menlyn, esePitori.	E-Standard Bank, se-Killarney, ese-Rosebank	E-Nedbank, ye-Rivonia, eseJwanisbhege
E-ABSA Towers North, ese-Jwanisbhege	E-FNB Merchant Place, e-Rivonia, eseJwanisbhege	E-Standard Bank, se-Canal Walk, eseKapa	E-Nedbank, ye-Lakeview, ese-Roodepoort
E-ABSA Ghandi Square, eseJwanisbhege	E-FNB Lifestyle Centre, ese-Centurion		

ZAMAPHILO

Ukunikela ngesitho somzimba kungahlenga ipilo

Noluthando Mkhize

U-Mosa Mphore uthi sekufike isikhathi sokobana amaSewula Afrika alise ummoya womkhumbulo omumbi mayelana nokunikela ngezitho zomzimba.

"Abantu bathi ukunikela ngezitho zomzimba yinto engakalungi. Bathi batjho lokho kuphambana nekolo namasiko wabantu. Bayakhohlwa ukuthi nawuvumela ukuthi kunikelwe ngezitho zakho zomzimba unikela omunye umuntu ithuba lesibili lepilo," kutjho u-Mphore.

U-Mphore bekakhuluma nebakwa-Vuk'uzenzele asekhobo, e-Soweto, eJwanibhege. U-Mphore ubufakazi obuphilako bokuthi kuqakatheke kangangani ukunikela ngezitho zomzimba, ukuqakatheka kokuthi kungabanikela njani abanye abantu ithuba lesibili lepilo.

UKULWELA UKUPHILA

Ngomnyaka wee-2011 ipilo ka-Mphore yatjhogululuka ebubini nakathoma ukugula, wazithola asesibhedlela ipilwakhe ilengele ngerharheni.

"Ngikhumbula lesigemege inga senzeke izolo. Ngahlangahlanga khulu nangithoma ukugula. Ngangithi ngisazizwa kuhle ngiphilile, pherhupherhu sengimumuntu ogo nyuluka kabudisi, bengiphelelwe mamandla khonokho!

"Bengiphele ngisongwe mathumbu, ngibuyisa soke isikhathi, kungananto ehlalako ngendeni. Lokhu-ke kwangethusa khulu nje ngoba ngangimuntu omutjha, ngiphila ipilo ehle (yemikghwa emihle) ngenza nokunengi okusebenzisa umzimba, njengokugijima nokudlala ibholo ephaywako."

U-Mphore wayokubona udorhodere, owathola ukuthi umtjhiswe weengazi zakhe uphezulu khulu njengombana phela asesemncani nje, ngalokho-ke kwasolisa ukuthi mhlambe iziso zakhe azisebenzi kuhle.

"Abodorhodere bathatha amasampula womhlambulukwami, owatjengisa ukuthi unamaphrotheyini amanengi. Iziso zami zazingasasefi amaphrotheyini nesila ejika ibe yitjhefu. IsiBhedlela i-Chris Hani Baragwanath safakazela ukuthi ngasele ngisezingeni lokugcina lesifo seziso ezibhalelwa kusebenza.

"Abodorhodere bangihlathululela ukuthi lobubujamo obunje bubangwa mtjhiswe ophezulu weengazi osukela emndenini wami onalesisifo esingalaphekiko."

U-Mphore uthi abodorhodere bamtjela ukuthi unetjhu njengombana asaphila.

"Ngahlala esibhedlela iinyanga ezintathu, ngathoma ukulatjhelwa iziso ngehlelo lokwelapha iziso ekuthiwa yidayalalisi."

Ihlelo lokwelapha iziso ekuthiwa yidayalalisi, lisebenzisa umtjhini osefa okungasafunekiko emzimbeni, amatswayi netelezi eengazini lokhuya iziso nazingasaphilanga kuhle ukuthi zenze umsebenzazo ngefanelo nangokwaneleko.

Idayalalisi yona ndlela evamileko esetjenziselwa ukwelapha isifo seziso ezibhalelwa kusebenza nasele sikhambelele.

UmNyango wezamaPhilo uthi idayalalisi iyatholakala eembhedlela zombuso ezihlu-kahlukeneko elizweni lokeli: eTlhagwini Kapa esiBhedlela i-Kimberley, esiBhedlela i-Klerksdorp, esiBhedlela i-Job Shimankana Tabane kunye nesibhedlela sesiFunda i-Mafikeng (zontathu ziseTlhagwini Tjingalanga), isiBhedlela i-Universitas (esiseFreyistata), isiBhedlela i-Livingstone nesibhedlela i-Frere ezisePumalanga Kapa, isiBhedlela i-Tygerberg

isiBhedlela sabeNtwana i-Red Cross War Memorial kunye nesibhedlela i-Groote Schuur eziseTjingalanga Kapa.

KwaZulu-Natal isibhedlela Inkosi Albert Luthuli sinalo iziko ledayalalisi, kanti e-Gauteng khona itholakala eemBhedlela i-Charlotte Maxeke, i-George Mukhari kunye ne-Steve Biko Academic.

EMpumalanga idayalalisi itholakala esiBhedlela i-Rob Ferreira nesibhedlela seMalahleni.

U-Mphore uthi ipilo ibe budisi khulu kuye njengombana besele akghokgha nje, angena aphuma esibhedlela.

"Lokhu kurage njalo bengathoma ukusebenzisa idayalalisi ekhaya; nakho lokho-ke azange kube lula, khulu khulu njengoba beku-fuze nginande ngifakwa umtjhini qho ngemva kwama-awa amane, kobanyana ungilekelele."


U-Mphore uthi ngomnyaka wee-2013 walinzwa wafakelwa iso.

"Kwangithatha iinyanga ezintathu ukuphola ngemva kokuhlinzwa kwami ngifakelwe iso yomunye umuntu. Ngenca yalokho engadlula kikhlo, ngiziphe ukuthi ipilwami ngiyinikelele ukuphandlulula abantu ngokunikelwa kwezitho zomzimba, ngokubacocela indabami, ngibacocela nangezifo ezingalaphekiko."

IHLENGANO I-OPEN-EYE

Lokha u-Mphore nakasalele esibhedlela, wenza isithembiso sokuthi ahlenge ubuncani bakhona munye umuntu ekuguleni, abe afundise nomphakathi ngesifo seziso.

"Ngavula iHlangano ebizwa ngokuthi yi-Open-Eye, ekuyihlangano yokuphandlulula umphakathi ngezamaphilo, efundisa umphakathi ngezifo ezingalaphekiko kunye nangobuhle bokunikela ngezitho zomzimba, zona ezihlenga ipilo yabantu; yihlangano



U-Mosa Mphore uthole ithuba lesibili lepilo, ngemva kokuhlangwa ngokuphiwa iso. Nje selakhamba afundisa umphakathi ngokunikela ngezitho zomzimba.

engasiyo ngeyokwenza inzuzo le."

Ungezelela ngokuthi ipilo ibe neenkhisikhisi, kodwana yena uthokozela ukuthi unikelwe ithuba lesibili lepilo, okumenze ukuthi anikelele ipilwakhe ekufundiseni abanye.

Eminye imininingwana ngokunikelwa kwezitho zomzimba ungayithola ngokuvakathjela ubunzinzolwazi ku: www.odf.org.za namkha ufowunele inomboro engabhadelwako ku: 0800 22 66 11.

Ekufuze Ukwazi Ngokunikela Ngezitho Zomzimba

ORGAN DONOR FOUNDATION



A bantu abanengi abazi ukuthi ngokunikela ngezitho ngemva kokubhubha kwabo bangahlenga basindise ipilo engaphezulu kweyomuntu munye.

Babalwa ngeenkulungwana abantu abalindele umuntu onganikela ngesitho somzimba kobanyana baphile bona, namkha baphile ipilo ejayelekileko.

Iinhlango ezinjenge-Organ Donor Foundation zilekelela umphakathi zibe ziwufundise ngokunikelwa kwezitho zomzimba, zibe ziphandlulule nomphakathi ngokuthi kuyinto erhabeke kangangani ukuthi bazitlolisele ukuba babantu abanikela ngezitho zabo zomzimba.

U-Emlynn Roynie we-Organ Donor Foundation uthi njenganje eSewula Afrika bangaphezulu kwee-4 300 abantu abakhulu nabantwana abalindele ukuhlinzwa bafakelwe ezinye izitho zomzimba nabasafuze bahlutjwe amehlo.

"Okubuhlungu-ke kukuthi kilababantu, bangaphasi kwama-600 abazakuphumelela ukuhlinzwa bafakelwe izitho zomzimba

abazidingileko ngaleyindlela babe bathole nethuba lesibili lepilo; lokhu-ke kungena yetlhayelo ekulu ekhona yezitho zomzimba ekunikelwa ngazo elizweni leSewula Afrika. Sikhuthaza besikhwezelela woke umuntu ukuthi azitlolisele ukunikela ngezitho zomzimba, kobanyana kuzokurarululeka lomraro omatluhuwo," kutjho u-Roynie.

Nanyana ngubani ophile kuhle, ongasifiso esingalaphekiko esingahle siqhaphazele loyo oyokusizwa ngesitho ekunikelwe ngaso, angavunyelwa ukuthi abe mnikeli ngezitho.

Izitho zomzimba ezinjengehliziyo, isibindi nephengkhrisi zingasindisa ipilo yabantu abathathu, kanti-ke iziso namaphaphu kungasiza abanye abantu abane.

Akubhadalelwa ukunikela ngezitho zomzimba, begodu nakube umuntu ogulako ulekelelwe ngesitho somuntu wekhobo (womndeni), akunandleko zokunikelwa kwezitho ezibhadelwako.

Ngenza Njani Ukuthi Ngibe Mnikeli Ngezitho?

Nawufisa ukuba mnikeli ngezitho, fowunela i-Organ Donor Foundation enomborweni yomtato yaSimahla ethi: 0800 22 66 11, namkha uzitlolise kubunzinzolwazi ku-www.odf.org.za


Hlala soke isikhathi uliphethe esipatjhini sakho semali ikarada lakho lokunikela ngezitho, unamathisele nestikhara se-Organ Donor kumazisi wakho kunye nelayisenseni yakho yokutjhayela. Kuqakathekile ukuthi umndenakho wazi ukuthi umnikeli ngezitho zomzimba, ngoba NGA-PHANDLE kwemvumo yomndeni izitho zakho asoze zaba mnikelo.

Tjheja Iziso Zakho

I sifo seziso esingalaphekiko simbulalisidiso osolo aqeda iinkulungwana ngeenkulungwana zabantu ephasini zombebele.

Solo liyanda inani labantu ekufuze belatjhelwe izifo zeziso. Lokhu-ke kungezelela umthwalo obudisi osele vele uthwelwe lihlelo lezamaphilo.

Ukuthi uphile kuhle emzimbeni nokuthi ubalekelele ukuphathwa sisifo seziso, tjheja iziso zakho, uzibabalele.



Nawufuna eminye imininingwana ngedayalalisi, dosela umtato ku:

ETlhagwini Kapa
IsiBhedlela sesiFunda i-Kimberley – 053 802 9111

ETlhagwini Tjingalanga
IsiBhedlela i-Klerksdorp – 018 406 4600
IsiBhedlela i-Job Shimankana Tabane – 014 590 5100
IsiBhedlela sesiFunda i-Mafikeng – 018 383 2005

EFreyistata
IsiBhedlela i-Universitas: 015 506 3500

EPumalanga Kapa
IsiBhedlela i-Frere – 043 709 1111
IsiBhedlela i-Livingstone – 041 405 9111

ETjingalanga Kapa
IsiBhedlela i-Tygerberg – 021 938 4785/6
namkha 021 938 6595/6

IsiBhedlela sabeNtwana i-Red Cross War Memorial – 021 658 5111
IsiBhedlela i-Groote Schuur – 021 404 9111

KwaZulu-Natal
IsiBhedlela Inkosi Albert Luthuli – 031 240 1911

E-Gauteng
IsiBhedlela i-Charlotte Maxeke – 011 488 4911
IsiBhedlela i-George Mukhari – 012 529 3111
IsiBhedlela i-Steve Biko Academic – 012 354 1702

EMpumalanga
IsiBhedlela i-Rob Ferreira – 013 741 6100
IsiBhedlela seMalahleni – 013 653 2000

ELimpopo
IsiBhedlela sesiFunda se-Polokwane – 015 287 5000